

Il mund en cifras

DA GUIU SOBIELA-CAANITZ

■ **La gasetta emnila englaisa «The Economist» (customerservices@subscriptions.economist.com) publicgescha annualmain, dapi 1991, il cudesch da giaglioffa «The Economist Pocket World in Figures».** La 25avla ediziun* sa preschenta sco suonda: «Anc adina è la ina chava d'aur cun infurmaziuns fascinantas; ella vul infurmar e divertir enina. Lezza è bramamain plaina da fatgs e cifras davart il mund d'oz, cun temas uschè variads sco geografia e demografia, affars ed economia, turissem ed ambient, societad, cultura e delicts.» Il cudeschet è «printed and bound in Italy», e quai tar L.E.G.O. (Olivotto) a Vicenza (Veneto). El cumpiglia duas parts. L'emprima, intitulada «world rankings», examinescha «las prestaziuns da 183 stadis en ina seria da secturs». La part «'country profiles' examinescha detagliadamain 67 stadis impurtants (...) sco era l'intschess da l'euro e da l'entir mund». I suondan insaquants exempels.

Records da stadis

Pro mintga sector da «world rankings» examina numn'ins ils emprims tschingt stadis.

– «Surfatscha en km² : Russia 17 078, Canada 9 985, Stadis Unids 9 834, China 9 597, Brasilia 8 515» (p. 14).

– «Popolaziun en milliuns il 2013: China 1 385, India 1 252, Stadis Unids 320, Indonesia 250, Brasilia 200» (p. 16).

– «Augment annual da la popolaziun en % (2015–2020): Niger 3,9; Mali, Uganda e Zambia mintgamai 3,2; Gambia 2,1» (p. 17); tuts en l'Africa tropicala.

– «Sminuziun annuala da la popolaziun en % (2015–2020): Bulgaria –0,8; Libanon, Moldova ed Ucraina mintgamai –0,7; Lettonia e Serbia mintgamai –0,6» (p. 17).

– «Naschientschas promil il 2014: Niger 50, Tschad 48, Republica Centrafricana 47, Angola e Congo democratic mintgamai 46» (p. 18), tuts en l'Africa tropicala.

– «Umans fugitivs albiertiads en millis il 2013: Pachistan 1 615, Iran 857, Libanon 856, Jordania 642, Turchia 610» (p. 25), tuts en pajais islamics.

– «Morts da malaria per 100 000 avdant(a)s il 2012: Tschad 136, Republica Centrafricana 116, Niger 110, Nigeria e Sierra Leone mintgamai 108» (p. 84), tut quels morts en l'Africa a nord da l'equator.

– «Persunas malsaanas da tuberculosa per 100 000 avdant(a)s il 2012: Sierra Leone 1 304, Swaziland 907, Africa dal sid 857, Mauretania 794, Cambodscha 764» (p. 84).

– «Morts da sida per 100 000 avdant(a)s il 2012: Lesoto 755, Africa dal sid 449, Swaziland 443, Moçambique 305, Zim-

babwe 288» (p. 85), tut quels morts en l'Africa a sid da l'equator.

– «Access a l'internet per 100 avdant(a)s: Islanda 96,6; Bermuda 95,3; Norvegia 95,1; Svezia 94,8; Danemarc 94,6» (p. 93).

– «Derasaziun da CO₂ en milliuns da tonnas il 2011: China 8127, Stadis Unids 5483, India 1753, Russia 1710, Giapun 1200» (p. 105).

La Svizra

La Svizra (41 293 km²) dumbra 8,1 milliuns olmas. «Ses exports van per 19,5% en Germania, (...) per 7,5% mintgamai en Frantscha ed Italia e per in total da 54,9% en ils 28 stadis da l'Uniu europeica (UE). Ils imports svizzers provegnan per 29,5% da la Germania, 10,6% da l'Italia, per 8,7% da la Frantscha, (...) e per in total da 72,9% dals 28 stadis da l'UE (...). La proporziun annuala da las maridaglias per 1000 avdant(a)s è da 5,3 e quella dals divorzis 2,2. 81,3% da la popolaziun fa part d'ina confessiun cristiana, 11,9% na fa part da nagina religiun, 5,5% è islamic (...) e 0,4% hinduistic. 86,7% da la popolaziun fa diever da l'internet» (p. 223).

L'Austria

«The Economist Pocket World in Figures» descriva t. a. ils dus principals pajais limitrofs dal Grischun. L'Austria (83 855 km²) dumbra 8,5 milliuns olmas. «Ses exports

van per 30,1% en Germania, per 6,5% en Italia, per 4,7% en Frantscha (...) e per in total da 70,1% a l'UE. Ils imports austriacs provegnan per 41,8% da la Germania, per 6,4% da l'Italia, per 4,8% da la Svizra, per 4,2% da la Tschechia e per in total da 76,6% da l'UE (...). La proporziun annuala da las maridaglias per 1000 avdant(a)s è da 4,6% e quella dals divorzis 2%. 80,4% da la popolaziun fa part d'ina confessiun cristiana, 13,5% na fa part da nagina religiun, 5,4% è islamic (...). 80,6% da la popolaziun fan diever da l'internet» (p. 117).

L'Italia

L'Italia (301 245 km²) dumbra 61 milliuns olmas. «Ses exports van per 12,4% en Germania, per 10,8% en Frantscha, (...) per 5,1% en Svizra e per in total da 53,8% a l'UE. Ils imports talians provegnan per 14,8% da la Germania, per 8,5% da la Frantscha, per 6,3% da la China, per 5,7% dals Pajais Bass e per in total da 55,4% a l'UE (...). La proporziun annuala da maridaglias per 1000 avdant(a)s è da 3,5% e quella dals divorzis da 0,9%. 83,3% fan part d'ina confessiun cristiana, 12,4% na fa part da nagina religiun, 3,7% è islamic (...) e 0,1% hinduistic. 58,5% da la popolaziun fan diever da l'internet» (p. 167).

* Profile Books Ltd (ed.), **The Economist Pocket World in Figures, 2016 Edition. Londra (ISBN 978 1 78125 447 9) 2015.**